

1. Ngo Arsaeng Arbosobo Leil Ddarzzi

Arbosobo leil nawo a; ngo leil tiur teixl lei a yar ddei ssormine loxr lol.

Halleix, ngo halae daxlxiuxr zza dae seir, ngua leil Yiyul mul gger su sulmulsu ddei ngo leil Yisu arseir a biar gger. 2002 nixr hal cir koxl Sexldaxljixr (hherdder Yisu leil xiu hal cir ni goxr a), yar dder ngua cirba-lorbba dax cirgo a Sexldaxljixr goxr, yar ngua cirba-lorbba leil zzaegu ar ddei vae zaxr lol a zzicarzzi leil ho gger lol, yar halae ngua leil arsaenga a Sexldaxljixr goxr biar gger. Eilmerxixl ci a, yar ngo nei kebal yar dax gaxggor seir sulzzasu ceiceimo leil yar ake ae si a yar dax cirgo a Sexldaxljixr goxr, yar ngua leil Yisu leil biar dae dixrpil ar ddei i lol.

Giedae Fuxlhoxrjixr (hherdder Yisu gol du xixl lei hal cir ni goxr a), yar yoxl ngua leil cir ddei leil yixfu ar taex faex gger, ngua leil arsaenga a Fuxlhoxrjixr goxr biar gger. Halae ngo nei kebal ar ddei leil hier dae a jiaxlhuixl gga lirbaexl bei ssi, nael ngo halae Yisu leil ddar-nr-zzi seir, ngo halae saexl gax-nr-zi.

Giedae faxljiaxl, yar dder ngo dax cirgo a ngua ake ssi a sir ni hher a; yar ngapopo hhexr dax ssi a, ngapopo hhexr ddei ake mel hher lei hher nr cexr. Almer ssu xiaxr jjia mia a, yar dder ngo leil ake bei box a zzirbae hormolsael nga nia

biex, yel ngo biex ho a yar leil bbeix gger. Yar dder ngapopo yaa leil bbeix: “Ngo jiaxhuxl dax arleixr zzibbe a, nia leil zzirbae ar mel gger a, nia xi ddei arleixr bei box, nr loxr mel nael nia armael ddux dax, nael zzirbae eil mel kebal sser nr ddo,” eine bbeix.

Ngua yar leil nawo car a, yar leixrhher ddei merlabbor dor dae a bbeix: “Ngo leil nawo nr ddo, Arbosobo leil nawo nia, Arbosobo nia leil gger arddeir a,” eine bbeix a. Giedae yar jjixr ho a dder zzirbae ddaexr mal gger lei a; ngapopo hhexr dder xibe box a.

Eine goxr ho a, ngo halae Yisu leil ddar-nr-zzi seir, nael yar yilzi a ngo leil yarzi perniar, ngo leil almeixr zzor qie, yaa dax cirgo a Arbosobo dax ddar biar, ngua hhexr leil pia veixr labox gger. Giedae ngo sul zza bixryixr ho a dder yar leil lei zabbar mia nr goxr a; ngo lei ngua ake dax naer dae zzi ddei gga jjixr lei a. Giedae ngua ake ddei mi lei a lei xiaxr a, xi bei box a lei yar ngua leil ar mel beijjiu a.

Giedae hormo koxl nei goxr ho a; ngo lei miar hormo yoxr lei bei a; nael 2011 nixr hal koxl, ngo seyil bei a zzirbae lei sser loxr nr ddo, halae si dax zzirbae lei cir dae. Cir ni a, ngo dax bei carbeix ssormae ar ddei a Yisu leil ddarzzi ngo saexl a; yel ngo dder yar leil zzi eil ddei gga arddolmaex jiaxlhuixl zza biex. Yar ngo leil bbeix gger ho a Xiciti leil

ngo dder jiaxljuixl gga ssi a. Ngo 2012 nixr hal cir koxl sexlsir a; ngo Arbosobo leil yarzi nawo, Yisu leil yarzi nawo.

2. Ngua Ca Hhexr Arsaе Arbosobo Leil Ddarzzi

Ngo lei giedae ake jjixr a ngabo, ngapopo, nganeipo leil Yisu ddei ddar seirseir mel biar gger; yaa cirleixr dder ddarzzi a. Yaa mar a ssi nr var a, ngo dder ngua jiaxlhuixl gga Arbosobo ddei ddar mul gger su ddei leil qie a ake ssi a, yaa leil sexlsir gger ssi lol. Yar dder arzzi-nimar arzzi-nimo ar mel hier dae a, sexlsir gger lei a. Yaa cirddei-hanga lei Arbosobo yaa leil arsaе lerler beijjiu hal mel ngua cirhhexr-lorbba nei ngua ake hher dae cirssor mel leil biar gger. Arbosobo ddei ddar mul gger su ddei lei Yisu ddei ddar seirseir mel ca cike-lorbba leil biar gger. Hal cir ni, ngua ake hher dae ca maelmaerjjia lei Yisu leil ddarzzi a. Ngo holcir a sirler sael zza, giedae zzizzi yoxl ar mel ddarzzi dax a, eilni ci a ngua cirssor leil suax dax a mel nrzeimo nr ci sael zza a. Ngo Arbosobo leil yarzi nawo, ngo saexl, ngo leil Yiyul mul gger su ddei ngua cirhhexr-lorbba nei yar mia goxr ngo ddei cirssor mel leil Arbosobo dax ddar biar gger a Arbosobo noni a. Arbosobo leil nawo a; yar ngo ddei sulmulsu, jiaxlhuixl gga, yar ddei ddar mul gger su, nei arzzi-nimar arzzi-nimo mel leil sser dae a yar leil saexl loxl.

3. Ngo Yisu Leil Koxl Beil Boxl Leil Biar

Eine ar ni a, mercixl a neixmar niazzi dae a; ngo gojiacae zzi dae a jiaxlhuixl gga Arbosobo ddei ddar noni ssi. Ngo mel cuaho peixl dax malmal ngier dae, neixleixrsael, mersi jia a dder ngo meixddur gga meixddur-beller ar ddei jia dil si a. Ngo no wor nr ddo a cirleixr dder tiuxl du lei a; ngo arsae bei nia lei nr saexl, no lei no wor nr ddo, nael ngo dder nialngasael Arbosobo dax ddar biar. Ngo bbeix: “Arbosobo, ni ngo leil beijjiu la, ngo no wor nr ddo a. Yisu, ni ciza-hanga no lei i kor gger xie mel, ngo ddarzzi; ni ngo meixddur-beller ddei gielgiel ddux lol var, ngo ddarzzi; ngo ni dax ddar biar teixl ho a meixddur ddei pu kae a dder meixddur-beller ddei dder ddux a, meixddur ddei lei kor a. Yisu ngo ni leil nawo a; Arbosobo ngo ni leil nawo a; ngo Yisu mi ddei leil koxl dae a bbeix, amae.”

Nael ngo dder meixddur ddei pu kae a. Pu kae a gie, meixddur-beller ddei dder hher nr ji dae a; ngo meixddur ddei lei kor a; ngo yarzi ggesse, ngo yarzi saexl, Arbosobo mel yarzi gol dae ar ddei a bbe, halae yarzi niul leil perniar, niul leil beijjiu su ar ddei a bbe.

4. Ngo Sser Zoxr Mel, Arbosobo Ngo Leil Gger

Ngo gosi ar ddei gga saxlba ssi a ngaseir, zzixzi malmal ggur, nael ngua mel saxlba a veixr labox pia lar veixr ddo, pia mel yarzi bbor a yarzi zzix, yel ngua leil guaxr su ddei dder bbeix, armael ddei teixlsibbor pia ar xiux veixr ddo, nael neixlneix lar veixr ddo, kebal yixrsaexr mel veixr nr ddo. Nael ngo nr zza, ngo lei pia vae labox zzirbae nr zza. Ngo dder Arbosobo dax ddar biar a bbeix: “Arbosobo, ngo saxlba a teixlsibbor veixr labox pia neixlneix a veixr ddo, nael ngo nr zza. Nr veixr a zzael, ngo zzix wor nr ddo; ngo pia vae labox zzirbae zzael, nr zza. Ngo ni leil qiuxr, ni ngo leil pia vae labox zzirbae gger bbeixsael ngo leil pia neixlneix ar xiux gger la. Ni ngo leil beijjiu var ngo ddarzzi, ngo ni leil nawo a; ngo Yisu mi ddei leil koxl dae a bbeix, amae.”

Giedae cir nr ni goxr ho a, ngo Xiqiti leil jiaxlhuixl gga Arbosobo ddei ddar zza ssi hal cir ni, ngua jiaxlhuixl gga arzzi-nimo ar ddei a ngo leil teixlsibbor veixr labox pia neixlneix ar xiux gger a; yarzi igax zae, halae yarzi ngo dax veixr hoxr. Ngo Arbosobo leil yarzi nawo. Yar ngo ddar biar dae mel leil noni, halae ngo leil ngo sser zoxr mel gger. Ngo Yisu leil nawo a; yar ngo leil weix a sixrzixljiaxl ddei leil diexr zil; yar, yar ddei sirnilni mel sser a ngo ddei zuixl mel

cir pixl gger, ngo leil Arbosobo ddei aniux loxr lol. Ngo yarzi ggese.

5. Saxlba A Caezi Zzi Wo Lol

Ngo saxlba ggie gosi yarsixl hal ddei mel, zzi dax ardoxr giex vimir dae. Yel ngua saxlba su mel zoxlzoxl a ngua gosi yarli ddei dax xia dae a, gosi gga ddei caezi jiaxl ngua leil gosi yarsixl ddei gga gga mal.

Eine ar boxl a, ngo neixrneixr-sisi ha du lei a jiaxlhuixl gga Arbosobo dax ddar biar ssi. Biar teixl ho a ddux lei a, jjiumo car gga ngier dae a caezi xia. Jjiumo eil zex mel ngua saxlba a ssi gel ggur. Ngo hormo dir ci a arleixr i a giel cixrdoxl niazzir dae a bbe. Nael gosi gga caezi jiaxl leil zzae ssi ssi jiexr a lei nr saexl, gojiacae zzae nr zza, ngo arsae bei nia lei nr saexl. Nael ngo dder Arbosobo dax ngo leil caezi zzi wo lol la, ngo leil tor cixr-nr-doxl lol qiuxr. Ngo jiajia qiuxr teixl a qie, caezi nilni ar jiaxl a dder ngo xilmeir nor dae a; ca hal ddei ngo leil ae a yar dax caezi zzi lol. Ngo zzael, arseir a zzirdae, nael caezi jiaxl dax naelnaer a ssi ci a saelnei ngo saexl, ca eil ddei ngo dax gosi cir ddei a nr nga, nael yar gosi ddei ngua dax naer dae, ddar nr boxl sael a te goxr. Ngo Arbosobo leil yarzi nawo, hal cir nehe yar ddei caezi jiaxl zzi wo a ngo dder cixr-nr-doxl a; Arbosobo mel zoxlzoxl a ngo dax hher dax doxr dae.

6. Ngo Leil Caezi Zzi Wo Lol

Ngua dax mel caezi zzi fa-nr-bixl. Caezi mel neixrneixr-sisi dder zzi gga kae mal, ha du lae a mel dder caezi zzi wo nr ddo a. Eine ar boxl a, ngo ake jjixr. Ake nr ni sael hher ho a, ngo mel zzi gga jjixr du a. Nael ngabbor ngama yaa ngo leil zzaegu cirsax geso gger a, ngua zzaegu mel vei dae a caezi zzi ggie ssi ci a mel, caezi zoxlzoxl a ssi dae mel lei ssi jjia a; yel ngua arsae bei nia lei nr saexl. Ngabbor dder ngo leil bbeix: “Caezi nr zza; eilni jjixr nr cexr a.” Ngo dder ngabbor leil bbeix Arbosobo dax ddar biar a yar leil qiuxr a yar dder ngo leil bei har zaxr gger var, yel ngo dder Arbosobo dax ddar biar. Biar teixl cirleixr a ngasseir dder caezi ar jiaxl kae mal lei a. Ngo dder yar dax zzi dax wo a zzi gga ze ci a. Nael ngo hher ggie jjixr a mel, halae saluixrcae zzi bbeixsael cuzucae duar zzi a, caezaxl gga ssi a bacae vae zzi box nia. Nael yarzi maxrfaxr, halae saluixrcae nei cuzucae nor ggie lei ngo caezi xiaxl hal maex dax sixrzixlluxlker vaervaermo ar ddei giex dae. Nael ngo caezi ddei leil ze ho a dder zzaegu mel ti dae a ssi a. Ngo dder Arbosobo dax ngo leil worniar dax lol. Ngo leil zzaegu mel leil ti du xie lol la bbeix teixl a qie, ngo dax malmal saluixrcae ar jiaxl nor dae a ngo leil arddol ssi biex. Ngo Arbosobo leil yarzi nawo, yar ngo leil gger dae mel bir ngo qiuxr dae mel leil lei seir leixl.

7. Yisu Ngo Leil No I Kor Gger

Arbosobo leil nawo a, ngo leil capor gger, halae ngo leil aniuX gger. Ngo aniuX niar dae car, yise bbeix ngo koxltor ddei ardoxr vaer a, ngo ar yoxr jircaxr nia, yel aniuX ddox seirseir dae i nia. Nael ngo mel jircaxr ssi nia-nr-zzir dae, ngo nixmox zzar zzirdae a, Arbosobo aniuX ddox leil seir lol var. Nael ngo capor mel halae Arbosobo leil nr saexl seir, yar mel jircaxr ssi niazzir dae. Nael ngo dder zzirdae a yar faxl-nr-xie a mel jircaxr ssi lei ddo. Eilyox jircaxr a mel, vimirmir zzi ar ddei gga jircaxr ssi nia. Nael ngua dder caezi zzi dae a ssi a. Hal cir xixlmei mel, ngo leihher ddei mel no a ddar lei te teixl lei nr xie, altor caer dae sael a seixseixlseix yarzi no, seixlho a lei no, ngo dder ngo capor leil bbeix gger a. Nael aniuXniar dae a ngua naxcir dda nr bel, aniuX ddox leil nr seir leil gexr. Ngo dder nixmox zzar Arbosobo dax ddar biar a bbeix: “Yisu, ngo ni leil qiuxr, ngo leil leihher ddei i kor gger la, ngo naxcir lei dda nr cexr, hherdder ni larnei ngo leil i kor gger xie. Ngo ddarzzi, arggenehe ngo zucur a ngo leihher ddei dder kor gaxzi a. Ngo lei ni leil qiuxr, ngo ni dax ddar biar teixl a dder ngo lei yixrmeixljjiu lol la, yixr seirseirmo ar xixl yixr lol la. Ni ngua leil guaxr dae, ngo ni leil nawo a, ngo Yisu mi ddei leil koxl dae a bbeix, amae.”

Giedae ngo arddolcar a yixrmeixljjiu a lei nr saexl, merteir a sael zucur. Nael ngo zucur a qie, ngo leihher ddei cirdoxr lei nr no dae a; ddar lei te teixl lei xie a; ngo Arbosobo leil yarzi nawo. Ni yar dax azo qiuxr zzorbbeixlei, ni ddarzzi a dder yar ni leil gger var.

8. Ngo Anix Xiu A, Arbosobo Ngo Leil Beijjiu

Ngo Arbosobo leil yarzi nawo, ngo leil anix gger, halae anix ddox ngo xilbe zzar hher ji dae seir dder anix ddox leil guaxr gger dae. Ngo anix xiu niazzir dae hal xiubbo, ngo saxl-nr-ba ake hher dae lalnga.

Eine ar xixl a, jiajia Xiciluxr cir xixlmei, ngo baxlyixl sael yixr ci a mel, xilbe no du lei a; nixngaxddux va mel sael a no, yel ngo dder sirbbeddur gga ssi a. Nael arcixl dox a lei ddux nr teixl lei, xilbe zzael no. Ngo dder yixrgguci gga jjixr a yixr jjixr. Nael cirleixr a yixr seir yoxl xilbe no du lei a; ngo dder yoxl sirbbeddur gga ssi. Nael nixngax zzael ddux nr teixl lei; sirnini zzael ddux lei a. Ngo dder Arbosobo dax ddar biar a ngo leil no wor xie a no lol. Hal cir xixlmei mel, no a sirbbeddur gga lei hormo boxl nei ssi a. Yel ngo eine ssi doxr a ngo capor leil bei zucur gger lei a gexr a, ngo giedae dder yixrgguci gga lei yixr nr jjixr a; tavuxi gga safaxr ddei leil yixr dae lalnga a. Ngo ssissi-leilei eine ssi doxr a, ngo yoxrpor bbejjiur a dder ddux lei a ngo leil bbeix, no wor nr ddo a nael, yiyuxl gga ssi. Nael ngo bbeix nr zzi,

ngo no wor ddo. Ngo nixmox zzar zzirdae, ngo yiyuxl gga ssi arddeirnga a mel, ngo dder Xiciti leil lirbaexl bei nr cexr a; nael ngo ssi nia-nr-zzir. Giedae ngo dder safaxr ddei leil yixr dae a Arbosobo dax ddar biar. Ngo bbeix: “Abosobo, ngo ni leil nawo a; ni ngua leil aniux gger. Nael ngo arggeni hoba Seirpor ni ddei aba zzor, beizi dda ho a saelnei yiyuxl gga aniux xiu ssi niazzir. Ngo ni leil qiuxr, ni ngo leil jiaxlhuixl gga ssi cexr lol la, ngo leil bei har zaxr gger la, ngo leil xilbe tor nr no lol, seilseir a lirbaexl bei cexr lol la. Aniux ddox lei ni ngo leil gger a; aniux ddox leil arddolcar xiu teixl lei nixixl ddei lei ni dixl arddeir a. Nael ngo ni lei qiuxr, ni ngo leil aniux xiu ggie yiyuxl nei yise bei har zaxr gger dae la. Ngo maelmaer lei ni leil jia gger, ngo ni leil nawo a. Ngo Yisu mi ddei leil koxl dae a bbeix, amae.”

Ngo biar teixl a safaxr ddei lei yixr dae a; ngo holcir a ngo mesil-mesar sael yixrmeixl arleixr jjiu a; nael giedae ngo no zucur a arleixr i a giel merteur a bbe, cixrdir do zo nga a bbe. Ngo dder Arbosobo dax ddar biar a bbeix: “Arbosobo, ngo ni leil nawo a; ni ngo leil armei cir xixl guaxr dae a, ngo leil no wor ddo a no lol. Nael eilboxl ngo ni leil qiuxr, ni ngo leil cirdoxr lei tor nr no lol la; ngo leil jiaxlhuixl gga ssi ci lol, lirbaexl bbeix a lei nr no lol, bei teixl a saelnei ni ngo leil yiyuxl gga hier mal. Ngo ddarzzi, ni ngo leil maelmaer

bei har zaxr gger dae ho a. Ngo ni leil nawo a; ngo Yisu mi ddei leil koxl dae a bbeix, amae.”

Ngo Arbosobo dax ddar biar teixl a qiaxrmeix arleixr cir a dder ssi a. Ngo jjiumo car gga ssi cirdae a jiaxlhuixl gga ssi ci a lei cirdoxr lei nr no. Giedae jiaxlhuixl gga caxlgo caxl nei huade tiuxl a Arbosobo leil bbeixzae gger a lei cirdoxr lei nr no, nixmox zzar yarzi ggese, sirnilnil lei nr ddux, ggecir ddei lei yarzi zzaso, ngo Arbosobo leil yarzi nawo.

Hal cir ni mel, Guxlsixl ddeixso cir ni malmal nga a. Yel ngo lirbaexl bei teixl a dder jiaxlhuixl gga ddux a jjixr niazzir dae a. Halcar malmal, arzzi-nimar arzzi-nimo capor maerssor ar zze a dder ngo leil bbeix, yaa caezi kae dae a ngo leil ho xixl, yel yaa dder ngo leil ngua hher ggie gielmi dax ho xixl ci a. Giedae zzocir zzor dae car a, ngo, ngo capor leil armei ngo sirnilni ddux a bbeix gger a. Yel giedae ngua almeixr zzor teixl a dder yiyuxl gga ssi a. Yiyuxl gga ssi ci a dder ngo no bbeix a yise leil jircaxr lol a, yise bbeix ngo zilgo ddei lei sixl gofe kae ho a; argaxl aniux xiu ggie lei ssi nr ci seir dder xiu teixl lei a, jjiumo gga xiu zil dae lei bbaexl eine bbeix a. Ngo leil nialngasael aniux xiu ggie ho dil gger a saelnei ngo capor leil serxuxlbaxl ssi lol. Arbosobo leil nawo a; zoxlzoxl sael mel yiyuxl eil ddei mel yarzi bbex, aniux xiu teixl lei niazzi dae mel lei xiu ggor-nr-

ddei a kebal yiyuxl gga xiu ssi lalnga, nael Arbosobo ngo leil bei har zaxr gger dae a, ngo yar leil nawo a.

Ngo sadirzo ainux xiu ggie xi giex gga ddir cirdae dder Arbosobo dax ddar biar a, cixrdirzo aniuux ddox xiu teixl lei zzeze biar ci a. Eil li goxl xiarsixr gga mel, ngo dder cirleixr nr nor Yisu dax ddar biar doxr, Arbosobo leil nawo a; ngo leil no wor ddo a no lol, aniuux ddox xiu teixl lei a yise mel yar leil ba gex du lei a dder aniuuxssor yixrggie yixr dae lol a, ngo dax naelnaer a hher dae lol. Ngo Arbosobo leil yarzi nawo, aniuux ddox mel meixxiuxxiux arla ngo leil i dae a yarzi jjiurddo, halae cirleixrleixr a lo cei teixl lei a ngo leil i dae a, ngo dax ddar biar dae sael a nga. Ngua nr mollor meixlddur sser a zzi dax ddar biar dae sael a nixmox zzar yarzi ggese, ngo no lei no nr saexl a.

Giedae ngo leil aniuux xiu ggie xi giex gga tui teixl a, ngo ngua jiaxlhuixl gga Arbosobo ddei ddar mul gger su, jiaxlhuixl leil guaxr su camar nei arzzi-nimar arzzi-nimo yaa leil mia a, ngo yarzi ggese. Yaa mel ngo capor yaa dax cirgo a hher dae, liargoxl xiarsixr sael xia a; ngo leil Arbosobo dax ddar biar gger doxr dae. Ngo yaa cir ddei leil lei bbeix nr gger, nael Arbosobo yaa leil ngo leil nei aniuux ddox leil i lei lol, ngo leil Arbosobo ngua leil perniar nei arzzi-nimar ngua leil perniar saexl lol. Ngo leil zuxlyuxl buxl gga tui mal a, ngo yixrgguci bul mel hherdder ngo

Arbosobo dax qiuxr dae bul dax ciyoxr a nga. Ngo yarzi Arbosobo leil nawo, ngo yar dax qiuxr dae mel, yar ngo leil gger.

9. Arbosobo Ngo Leil No I Kor Gger

Ngo aniux ddox halae cir koxl nr loxr seir, eine ar boxl a, ngo zilmodono a, cirgge-circir yarzi no, ha lei ha nr ddo, yixrgguci leil yixr doxr dae lalnga. Ngo dder Arbosobo dax ddar biar a bbeix: “Arbosobo, ngo ni leil nawo a; ni ngo leil yarzi perniar, ni leil qiuxr, ni ngo leil zilmodono ddei i kor gger la. Ngo aniux baxrda dae a naxcir dda nia-nr-zzir, ngo ni dax biar teixl a dder ngo leil yixrmeixljjiu lol la, arggenehe ngo zucur a dder ngo leil maelmaer kor lol la, ngo ddarzzi, ngo ni dax arsaе qiuxr dder arsaе nga var. Ngo ni leil nawo a; ngo Yisu mi ddei leil koxl dae a bbeix, amae.”

Arbosobo leil yarzi nawo, ngo hal cir xixlmei mel yarzi yixr seir. Giedae cir nehe, ngo zucur a zilmodo ddei dder kor gaxzi a.

10. Almeixr Nr Zzor Arbosobo Dax Ddar Biar

Eine ar boxl a, ngo Arbosobo dax ngo almeixr nr zzor yar dax ddar biar. Eilnexr-nehe ha du lei cirdae a, eilmerxixl luxrdir ci a saelnei almeixr zzor bbeix har a. Nael ngo hal gielggur mel halae aniux baxrda dae seir. Ngo dder

Arbosobo dax bbeix: “Arbosobo, ngo ni dax seirseir a ddar biar niazzir, ni ddei ddar zza niazzir, nael ngo halae aniux baxrda dae seir, ngo ni leil qiuxr, ni ngo leil aniux baxrda ddu zza lol la. Ngo ni leil nawo a; ngo Yisu mi ddei leil koxl dae a bbeix, amae.”

Giedae ngo xiaxlba a ake jjixr ci a; halcar mel luxrdir sael ci ddo jiur a; nael ngo aniux ddox ngo dax baxr dda leil a qie, baxr mel miur a yar dda lei dda jjia nr xie. Ngo yarzi Arbosobo leil nawo, ngo dder Arbosobo ddei ddar ar qir leil holcir du lei a bbeix: “Nia gol dae a mel zzor labox mel leil lar koxl dae nr nga a nei, ngo meir gga ddux lei ddar mel leil koxl dae a nga arddeir a.”

Arbosobo ddei ddar mel mel maelmaeljjia lei ngazi a; yarzi ddarzzi ddo.

11. Arbosobo Ngapopo Leil Merlabbor Zi Si A

Arbosobo leil nawo a; ngapopo leil yar dax zi si. Arbosobo yarzi ddo, yarzi seir, cirza-hanga lei yar bei har zaxr gger.

Eine ar nehe a, wurdirzo sael a ci seir, mer lei mer-nr-teir seir, ngo halae yixr dae seir, ngo ddei dixlhuaxl ddei dder me du lei a; nael ngo ngabbor ddaexr si lei a mia a dder niangasael jixr. Ngabbor ngo leil bbeix gger a bbeix: “Allor, arpopo nr zza a.” Ngo ddar eil qir leil noni ho a dder bbeix: “Arbosobo leil nawo a: arpopo leil merlabbor zi deix si a.”

Giedae ngajiulzil ngo leil dixlhuaxl gga bbeix: “Allor, arpopo Arbosobo leil ddarzzi a mel ngua Arbosobo mul gger dae mel sael a bei nia. Nael ngua bei nr var, ni jiaxlhuixl leil arleixr qie a niul leil beiijiu lei lol la.” Ngo dder bbeix: “Nga a.” Ngo dder jiaxlhuixl gga arzzi-nimo ar ddei leil dixhuaxl ddaexr gger. Giedae ngo capor ngua nnel dder arleixr geso a caezi ddei kae dae a jiaxlhuixl gga ssi a. Ngo xiar lei xiar nr ci, Arbosobo mel ngapopo marle a veixr labox pia mel lei bei har gger dae a bbe, jiaxlhuixl gga jiajia ngapopo dax veixr hoxr pia ar tox zza, halae pia vae labox zzirbae lei Arbosobo bei har zaxr gger dae ho a.

Giedae ngua dder caezi kae dae a jjixr a. Ngo lei kebal arzzi-nimar arzzi-nimo nnel leil dixlhuaxl ddaexr gger a ngajiulzil yaa leil beiijiu ssi lol. Ngua jjixr ci a mel, ngapopo nr zza wurgoxl xiarsixr sael nga a; nael ngua cirke a cirter a Arbosobo dax ddar biar ho a dder ngapopo leil pia lael gger. Halcar a mel ngapopo ddei ggecir ddei mel lomelmelmo ca gol sael a nga, leixrhher mel lei norlixlix arla, yar leil i dae a mel yixrmeixljjiu dae sael a nga. Ngua halcar cirke-lorbba lei Arbosobo leil bbeixzae gger. Ngua saexl, ca si ho wurgoxl xiarsixr nga a mel, ggerdodomo nga var, nael Arbosobo ddei anix mel eine nga nr var.

Giedae ngo ngapopo ddei xiaxlpixl ar zul dol ggie mia a; nael xiaxlkua gga nr ji dae. Yel ngo dder arzzi-nimo ar ddei

a, nr so ni xilmeir leil ngo leil xiaxlkua ar ddei gger a holcir du lei a; ngua ji a mel jiajia ji hoxr, Arbosobo leil yarzi nawo. Ngo yoxl bbejiur a bbeix, xiaxlpixl zul mel, ngapopo xiaxlpixl zoxl su ar ddei a zzirbae ddux nr ssa yaa xi ggaxrne camar leil zoxl gger dae bbejiur a, yar ddei yar zoxl ssi arddeir a; ngua saexl, maelmaerjjia lei Arbosobo bei har zaxr dae arddeir a.

Giedae ngajiulzil ngo dax bbeix a bbeix: “Allor, ngo Arbosobo leil ddarzzi nia.” Ngo ddar eil qir leil bbejiur wo a ngo dder bbeix: “Ni yarzi ddarzzi a ngo?”

Yar bbeix: “Nga a mar.”

Ngo noni ho a Arbosobo leil yarzi nawo.

Ngapopo leil giexlhex hal cir ni mel Xiciwur a; yel giedae cir ni mel lixrbbaex qiaxrmeix bei nia, hal cir meixixl, ngabbor ngo leil bbeix: “Allor, arggeni doxl jixrlixl ar ddei a; niul mermi doxl jixrlixl eil ddei gga miar eil mel nr bei lei, beijjiu lei su zza zzorbbeixlei, lixrbbaex qiaxrmeix leil sser dae legelbbe mel mel yarzi zo wo sol, cirmelmel a giel hormo ni nei zo doxr nia, halae zo wo sael arddeirnga a lei yarzi giexl teixl lei sol, cir ni bei teixl nr ddo arddeirnga a, capeixlni Xiciti zzae niul bei nr ddo, Arbosobo leil bbeixzae gger nixixl a lixrbbaex qiaxrmex bei nr ddo, hal mel arddolcar bei, eine goxr ho a doxl, si leil lei qie wo sol, arsaе bei?”

Ngo bbeix: “Arbbor, nr zzi, niul Arbosobo ddei ddar no a mel, Arbosobo niul lei beijjiu leilei, yar arsaе beijjiu nael ngo nr saexl, nael ngo ddarzzi. Arbosobo maelmaer yar guaxr dae, yar niul leil bei har gger var. Ni zoxrzixr nr ssa, ni Arbosobo bei har gger var ddarzzi a dder ddo a.”

Arbosobo leil yarzi nawo a; giedae cir ni ca mel dder beijjiu jjixr lei a, ake almeixr zzor si a yaa baxrdir do zo sael ssi, nael yaa hal cir ni legelbbe sser labox maelmaer lei zo wo a; halae bei teixl a wordabbor almeixr ar bbi bei lel si lei mael, ake jjixr ci a lei mercixl a ngaseir, neix-nr-mar seir. Arbosobo leil nawo a; yar niul leil yarzi perniar, cirzaha hanga lei niul leil beijjiu.

12. Arbosobo Ngo Ddei Anix Ddox Leil Beijjiu

Ngo ssor ddox nr koxl loxr ho a, eilne ar boxl a, yar leixrhher ddei leil alddur niax dae a; yarzi niax larhor, yar no wor nr xie a waerwaelwaer nge du lei a; leixrnissor nei leixrnissor dax naer dae hal ci leil niax gex dae a; leixrnissor ci gielgiel niax larhor, leixrni ci lei niax biax dae a; piu ar kur, ni ar kur, leixrni-saerkur ddei lei neixvuvumo loxr a.

Ngo nei arzzi-nimo mel dder yar leil Arbosobo dax ddar biar gger, yoxl yar leil xiaoxlsuxl ar doxr mei gger a; cirleixr dder leixrni nr ci ddei hoxrneixr mel dder kor a; nael

leixrni-saerkur ddei nael halae sirvumo zza dae seir, halleix ngo leil lei niax dae goxr a; yarzi no, didildi kexl, eilmerxixl gielgiel yarzi no, yel hal cir xixlmei yar yixr du a, ngo dder yar leil Arbosobo dax ddar biar gger.

Ngo bbeix: “Arbosobo, ngo ni leil nawo a; ni ngua leil yarzi perniar, ngo ni leil qiuxr, ni aniuux ddox leil leixrhher ddei tor nr no lol, yar leil yixrmeixljjiu seir lol, eilcar yixr ji cirdae a arggenehe yixr ci lol, ngo ni leil nawo a; ngo Yisu ddei mi ddei leil koxl dae a bbeix, amae.”

Arbosobo leil nawo a; ngo aniuux ddox hal cir xixlmei yarzi yixr seir, merteir zzezze lei cir boxl lei zucur nr goxr. Hane zzezze dder yar leil cir boxl lei no ggie bbeix bbejjiu nr seix a. Eilleix leixrni-saerkur sixl ner teixl lei ho a. Arbosobo ddei aniuux bei a yarzi seir, cirza lei zoxrzixr nr ssa.

13. Arbosobo Ngama Leil Beijjiu

Eine ar boxl a, ngama aniuux nnel leil hier dae a var vi her ssi. Nael aniuux nnel mel ngama dax jiar dax doxr, dexryil dexryil ajjix sser a ngama her goxr varssor mel leil co deix gger, varssor mel jiajia ner teixl lei a ngaseir a, yaa ajjix co a co zil gger a. Yel ngama dder varvi her nr cexr a yaa leil hier dae a jjixr lalnga a. Nr bbi sael a ssi seir, ngama dder Arbosobo dax ddar biar a yar leil beijjiu lol. Jiajia ddar biar teixl ho a, ngama dder mi ar bbae gga ngol ar ddei mia a;

yel dder ngol ddei leil ssu du lei a yaa nr hieni leil gaxggor lol. Yaa dder ggegge-sese a ngol ddei leil gaxggor doxr dae a, ngama dder var vi her jjia a.

Ngama ngo dax bbeix: “Arbosobo mel miar vaer lar niul leil beijjiu nr nga a nei, miar yelye mel lei niul leil beijjiu bbe naer.”

Arbosobo yarzi seir, halae yarzi ddo, yar niul leil cirzahanga lei beijjiu.

14. Arbosobo Ngua Leil Beijjiu

Eine ar ni a, ngua nr mollor jjiumo car a gga caezi duar a caezaxl gga ssi. Ngabbor lei ngua leil duar jjiu dae. Nael ngua arcixl duar a lei duar nr wo, zoxlzoxl sael nga a mel duar wo ho a. Ngo dder Arbosobo dax ngua leil caezi zzi wo lol la qiuxr. Giedae, ngua duar lei nr duar lei, cirleixr a hher seir dder caezi ar jiaxl a ngua dax naelnaer a nor ze lei a; ngo dder anix ddox leil hier dae a caezi leil zzi deix a. Ngabbor nael ake jjixr a.

Zoxlzoxl caezi duar zzi a mel zzijiul gga a ssi ci. Halae caezi ar boxl duar zzi box nia, nael ngo dder caezi kae su ddei leil ngo yar leil zzirbae ardoxr gger dax a, ngua leil caezaxl gga ho mal ci lol. Nael yar bbeix yar leil zzirbae gger nr ssa. Yar lei caezaxl gga ssi. Halcar saelnei ngo saexl, yar mel kebal ar maex gga miar bei dae a, eilni jiajia zzi eil ddei gga

jjixr lei, yar ca gga su nr nga, giedae ngua yar dax caezaxl
gga malmal zzi ci a.

Arbosobo leil yarzi nawo, ngo yar leil koxl a, yar cirza-
hanga lei ngo leil beijjiu. Yar ngo leil gger dae mel bir ngo
yar dax qiuxr dae mel leil lei miur.